

43. *Qu'il n'est pas vray-semblable que les causes desquelles on peut déduire tous les Phainomenes, soient fausses.*

Et certes, si les principes dont je me fers sont tres-évidens, si les consequences que j'en tire sont fondées sur l'evidence des Mathematiques, & si ce que j'en déduis de la forte s'accorde exactement avec toutes les experiences, il me semble que ce seroit faire injure à Dieu, de croire que les causes des effets qui sont en la nature, & que nous auons ainsi trouuées, sont fausses : car *ce seroit le vouloir rendre coupable de nous auoir créés si imparfaits, que nous fussions sujets à nous méprendre, lors mesme que nous vsons bien de la raison qu'il nous a donnée.*

44. *Que je ne veus point toutefois assurer que celles que je propose sont vrayes.*

Mais pource que les choses dont je traite icy, ne sont pas de peu d'importance, & qu'on me croiroit peut estre trop hardy, si j'affuerois que j'ay trouué *des veritez qui n'ont pas esté decouuertes par d'autres*, j'aime mieux n'en rien decider, & *afin que chacun soit libre d'en penser ce qu'il luy plaira*, je desire que ce que | j'écriray soit seulement pris pour vne hypothese, laquelle est peut estre fort éloignée de la verité; mais encore que cela fust, je croiray auoir beaucoup fait, si toutes les choses qui en seront déduites, sont entierement conformes aux experiences : car si cela se trouue, elle ne fera pas moins vtile à la vie que si elle estoit vraye, *pource qu'on s'en pourra seruir en mesme façon pour disposer les causes naturelles à produire les effets qu'on desirera.*

155

45. *Que mesme j'en supposeray icy quelques vnes que je croy fausses.*

Et tant s'en faut que je vueille qu'on croye toutes les choses que j'écriray, que mesme je pretens en proposer icy quelques vnes que je croy absolument estre fausses. A sçauoir, je ne doute point que le monde n'ait esté créé au commencement avec autant de perfection qu'il en a^a, en forte que le Soleil, la Terre, la Lune, les Estoiles ont esté deslors, & que la terre n'a pas eu seulement en foy les semences des plantes, mais que les plantes mesmes *en ont couuert vne partie*; &

a. Voir *Correspondance*, t. V, p. 168-9.